

道

古

錄

道古錄引

晉川管轄楚藩、始會余、與余善、至是讀禮山中、  
余往弔焉、晉川喜余至、故畱余、謂余無家屬、童  
僕何所、不可以棲托、晉川沁水人、而家於沁之  
坪上村、坪上去沁百里、村居不足數十家、頗岑  
寂、余喜其岑寂也、亦遂畱、天寒夜永、語話遂長、  
或時余問而晉川答、或時晉川問而余應、使平  
子若在、不知幾番絕倒矣、惜哉、無人記錄、

余亦每自嘆息焉。晉川之子用相用健者二人。有時在坐與聞之而心喜。然亦不過十之一二矣。退而咸錄其所聞之最親切者。其不甚親切者。又不錄。則又不過百之一二矣。然時日既多。積久亦成帙。余取而覆視之。不覺拊几嘆曰。是錄也。乃吾二人明燈道古之實錄也。室題其由曰明燈道古錄。遠之不足以繼周邵。近之不足以繼陳王。然此四先生者。精爽可畏。亦必喜而

讀之曰是明燈道古之錄也是猶在門庭之內也真不謬爲吾家的統子孫也然則晉川之畱余也果不虛坪上于今不岑寂矣空梓而傳之俾天下後世知吾二人并其二子不虛度時光也歟哉晉川姓劉名東星余四方之人也無名姓但聞有呼之爲李卓吾者卽自以謂李卓吾至坪上又聞有呼之爲七十一歲李老子者卽自以爲李老子云

書道古錄首

予西鄙之人也、拘守章句、不知性命爲何物、入  
楚期季、而暑患作、思親之念轉亟、欲息此念、則  
不能、欲從此念亦不能、真令人徬徨無皈依處、  
聞有李卓吾先生者、弃官與家、隱於龍湖、龍湖  
在麻城東、去會城稍遠、予雖欲與之會而不得、  
又聞有譏之者、予亦且信且疑之、然私心終以  
去官爲難、去家尤難、必自有道存焉、欲會之心

未始置也會公安袁生今吳令者與之偕遊黃  
鵠磯而棲托于二十里外之洪山寺予就而往  
見焉然後知其果有道者雖棄髮蓋有爲也嗟  
夫此身若弃又何有於家何有於官乎乃區區  
以形跡議之以皮毛相之者失之遠矣嗣後或  
迎養別院或偃息宦邸朝夕談吐始恨相識之  
晚云兒相時亦在側聞其言若有默契者一時  
吾鄉趙新盤王正吾叅政楚藩皆獲見其面李

克菴時撫三楚亦獲讀其書三公者遂皆信之  
以爲真人矣別後宦遊燕趙雖聞問不絕而欲  
從末由比者讀禮山中草土餘息懼有顛墜特  
遣兒相就龍湖問業先生欣然不遠千餘里與  
兒偕來從此山中歷秋至春夜夜相對猶子用  
健復夜夜入室質問學庸大義蓋先生不喜紛  
雜唯終日閉戶讀書每見其不釋手鈔寫雖新  
學小生不能當其勤苦也彼謗先生者或未見

先生耳、倘一見先生、卽暴強亦投戈拜矣、又何  
忍謗、又何能謗之邪、相與健等、旣獲錄其所聞  
之百二、予遂亟令梓行、雖先生之意、亦予意也、  
亦相與健等之同意也、晉劉東星誤



道古錄卷上

虞書云人心道心便是兩心心安有兩也曰心一也自其知覺運動而爲各人所發用者謂之人心自其主宰此知覺運動而爲天地人物大根柢者謂之道心人心不同有如其面卽以嗜慾一端言之南人食稻而北人食粟卽北人又有喜食稻而南人又有喜食粟者至於七情之發其爲不同也益甚故有一喜則百草生色一

怒則羣雄喪膽者亦有一喜則傾國傾城一怒則伏屍流血者其爲危險可畏莫如人心之甚豈不唯危也哉蓋身之安危國之興亡實係之矣若夫道心則無聲無臭不睹不聞豈不是極微妙不可窺測之理乎一危一微而人心道心從此遂分然微者旣聽其自微而不知潛心以究之危者又聽其自危而不知立本以定之於是危者益危非但知覺運動之僻者破國亡軀

卒與敗草腐木同歸灰燼卽知覺運動之正者  
令人歆豔誇述亦不過草木偕春而已至秋而  
生意亦盡無復有存矣其危而可畏一至於此  
故聖人重之慎之兢之惕之如履薄冰如臨深  
淵恐其卒死於危險之中而不能自活也然則  
當如何人心果有二乎天下安得有兩心之人  
也人心果無二乎而危微不同聖凡自別又安  
得而不謂之二也二之不得不二之又不得於

是乎聖人有精微之功焉。精微之功。生知者自別而生知者絕少。故其次爲學知。學知者十倍於生知。學知而不得。故其又次爲困知。困知者百倍於生知。則沒身不懈矣。弗得弗措矣。如是而精之。有不至於一貫之極乎。夫子之一貫。蓋學而知之者也。故曰假我數年五十以學易。吾蓋發憤而不知老之將至矣。其精也如此。是以能一。是以能繼堯舜之統而執萬世之中於不

墮也

夫子仕魯墮三都却萊兵誅少正卯其作用亦只如此乃子貢極其尊稱至以斯立斯行斯和斯來生榮死哀爲言豈賢者獨有所見而聖人功用固非人所識耶曰却萊兵自是正事誅聞人惡其惑衆夫三家柄魯魯君無民政在季氏久矣季氏能用夫子不知夫子道大非三桓所能用也然桓子雅意亦自難卻其墮成墮費等

正是其欲好抽身處。夫當時之君相夫子知之  
悉矣。周流不舍。蓋其道自與人羣無所逃避也。  
然雖不得行道於上。亦自足明道於下。若果得  
邦家。其經綸手段自然立。斯立道斯行。綏斯來  
動。斯和生而榮死而哀的。如子貢之說。非徒以  
尊稱其師爲也。夫子貢亦眼空一世之士者。自  
不容易服人。乃於夫子尊之如天。稱之不容口。  
築室獨居三季。猶不忍去。然則夫子縱得邦家。

終不若得一子貢之爲快矣。況子貢而上又有大賢如曾、閔者乎？故曰：歸歟！歸歟！夫子當時亦望庶幾有過於由、賜者，而不知由、賜亦難違也。故決意反魯，蓋夫子知得由、賜勝似得邦家也。如三桓之徒，何足以爲。

子夏云：仕優則學，學優則仕。今人居官理事，簿書填委，不遑暇食，何能讀書？且學者便能讀書，尚志行有餘力，無人薦舉，何能得仕？曰：仕學一

也。仕何事以行道爲事。是故出而治國。則國治。出而平天下。則天下平。便是實學。學何學以行道爲學。是故修身則道行於身。齊家則道行於家。便是真仕。仕卽是學。學卽是仕。仕與學一時具足。初非有待於外也。如此言仕與學。故其學爲真學。而其仕爲真仕矣。是故明德親民。一時並舉。簡易直截。不容欠缺。此之謂也。此乃吾夫子之學。所以爲天下萬世之宗者。而曾子述之。



爲大學子夏復發之爲學優之論同是出於夫子而惜乎今不講矣曰審若是則人民社稷正學之地子路之言乃實義也夫子何故惡之曰子路之言唯其合義是故夫子惡之惡之者惡其似義非義特取口給是佞也故曰惡佞恐其亂義也隨時制宜之謂義借義禦人之謂佞用健曰大學言至善便言格物此可見至善原無物也故止至善在於知止然必格物而後知

至知至則得所止而完吾無物之初矣故格物  
要焉然既言格物而又言物有本末又曰自天  
子以至庶人壹是皆以修身爲本何邪則身卽  
是物所以修身者卽是修此物矣此物如何格  
去得此物又豈空格去之也邪曰此身原無物  
也人唯以物視之則見以爲有身耳既見有身  
則見有我既見有我則見有人人我彼此紛然  
在前爲物衆矣如何當得其所以使人七顛八

倒者皆物也。故聖人格之格之如何。聖人知天下之人之身卽吾一人之身。人亦我也。知吾之身卽天下之人之身。我亦人也。是上自天子下至庶人通爲一身矣。是以雖庶人之賤亦皆明。明德於天下而親民以明其明德。凡以修吾一本之身立吾無物之體。明吾無修之修。故也。若有物則有身。有身則有我。如何修得此身來。用健曰。旣如此則完吾無物之初復吾太虛之體。

便是大學之道了却不曰道而曰近道又何邪  
曰吾聖人欲人於有物上通無物則知有物卽  
是無物耳故能通於無物則物卽是道而何病  
於有物苟不能通於無物則物尚是物而未可  
以言道也故言物言事言近者以此夫天下唯  
物與事耳物則有本末而道其有本末邪若謂  
道有本末則舛矣事則有終始而道其有終始  
邪若謂道有終始則悖矣但能知所先後則於

道庶幾近之夫於物也既能由末而先求其本  
矣獨不可由本而復先之以求至於大本乎於  
事也既能由終而先求其始矣獨不可由始而  
復先之以求至於無始乎知大本知無始卽此  
知所先後之心爲之也吾故曰聖人欲人於有  
物上通無物不曰無物而但言格物也

○某目○眼○看○

用健曰大學言平天下不曰天下當如何平當  
如何使民興孝如何使民興弟如何使民不倍

而但曰老老長長恤孤焉是欲平天下者唯在  
一人之身能孝弟慈而已一唯修身爲本卽平  
天下而可知也言治國不曰國當如何去治當  
如何去事君如何去事長如何去使衆而但曰  
善、根孝弟慈焉是欲治國者唯在一人之身能孝弟  
慈而已一唯修身爲本卽治國而可知也至言  
齊家又不曰家當如何而齊著、眼如何而父父如何  
而子子如何而兄兄如何而弟弟如何而夫夫

婦婦而但曰人莫知其子之惡莫知其苗之碩  
焉苟能好而知惡惡而知美不溺愛不貪得則  
自能去僻自然身修而家自無不齊矣是欲齊  
家者唯在一人之身不偏僻於親愛賤惡畏敬  
哀矜傲惰以順吾孝弟慈之性而已一唯修身  
爲本卽齊家又可知也至言修身亦無別有修  
之方唯說無忿懣好樂恐懼憂患數者之心  
而已無忿懣則自不偏於賤惡傲惰無好樂則

自不偏於親愛無恐懼則自不偏於畏敬無憂  
患則自不偏於哀矜故心正而身自修家自齊  
者以齊家之道修吾身也○着○眼○離家無別有修身之  
方矣以修身之道正吾心也○着○眼○離身亦無別有正  
心之術矣故曰壹是皆以修身爲本然天子而  
下以至公侯卿大夫皆有國與天下之寄其本  
在修身是也至庶人則煢煢一身一家於國於  
天下何與而通曰壹是何也且旣曰壹是則庶



人與天子等矣。普天之下更無一人不是本亦無一人不當先立其本者。吾是以未能無疑觀。今之天下爲庶人者自視太卑太卑則自謂我無端本之責。自陷其身於頗僻而不顧爲天子者自視太高太高則自謂我有操縱之權。下視庶民如螻蟻而不恤。天子且不能以修身爲本矣。況庶民邪。予謂天子有治平之責。固宜修身齊家以爲之本。若庶人雖無治平之任。然亦各

有家亦各有身安得不修身以齊之苟不齊則禍敗立至身不可保家不可完又安得不以修身爲本邪故齊家觀乎身天子庶人壹是無別由是推之以治國平天下直措之耳無容別有治平術矣用健曰旣如此則乎天下但說老老長長恤孤以盡孝弟慈三者足矣何必更言理財更言用人添出許多政務乎曰子但知平天下章又說用人又說理財不知爲政在人取人

以身用人亦以修身爲本也。生財有道則財恒足。理財亦不外修身大道也。試歷言之可乎。夫不察雞豚不畜牛羊不畜聚斂唯知好仁好義以與民同其好惡而府庫自充矣。則名曰理財。實公財耳。名曰生財實散財耳。如此理財乃所以修身者何曾添出事耶。斷斷兮無他技休休然如有容人有技若已有人彥聖心誠好名曰用人實不敢自用耳。名曰取人實好人之所好。

耳如此用人亦所以修身者又何曾添出事耶  
故曰壹是皆以修身爲本也

懷林曰人皆言佛氏教人明心孰知善明心者  
莫如孔子大學正心章分明是明心之旨夫心  
本無物也若有所忿懣等卽有物矣有物安能  
應物且既有所忿懣矣則忿懣在於吾心好樂  
之來又何以應之何也有客常在吾所主人不  
得空閒故也又忿懣既有所在在東乎在西乎

在中乎在東則西缺西必以爲不正也在西則東缺東必以爲不正也在中則東西俱缺東西必皆以爲不正也從此推之凡有所在無不皆然孰能定其正位乎故有所忿懣等皆不得其正者正以心如太虛本無一物不可以有所在而求之也如此則心誠無所在乎若謂心無所在則視不見聽不聞食不味百爲皆廢矣今視而見聽而聞食而知味神應不匱如此又安可

謂心遂無所在也。有所在則不得其正而不能應物。其爲心也。物而不神。非所以正心也。無所在則遂失其主。而何以應物。其爲心也。空而無用。亦非所以正心也。有所在固非心。無所在亦非心。於此明得則心正矣。故曰此謂修身在正其心。終不言心如何正。蓋欲學人自明之耳。余謂此一章乃夫子明心圖也。伏羲一畫而千畫萬畫。自變易而不可窮。是象圖也。物生而後有

象非吾心之初矣。大禹九疇而千疇，萬疇自洪著而可垂，法是數圖也。象生而後有數，去吾心益遠矣。故自古唯心難圖，而唯夫子能圖之。嗚呼！孰知其高出易範之上，而爲往聖之所不能發者哉！

中庸言天命之性是命者，性之原也。若不知命，則無由知其原，何以爲君子？旣知命，則千了百當，而知禮知言自在其中矣。豈知命之後，又有

知禮知言之功哉抑知禮知言正知命之實下手處也夫維天之命無聲無臭安得有言言之與命似無關涉何以獨急夫子罕言命豈言也者乃所以言乎其罕言之命邪中庸言思知人不可以不知天百世以俟聖人而不惑由於知人則知人固君子要緊處不知言無以知人則知言又是其極緊要處矣今觀小人唯其不知天命是以不知聖人之善言天而侮之既不知



聖人之善言天則必不能知聖人之爲大人而狎之矣狎大人不知人也侮聖言不知言也用相曰中庸一書皆吾夫子示人知命之學故首言天命之性而繼之以維天之命於穆不已終復結言之曰上天之載無聲無臭至矣其詳言命也如此其欲人知命也如此然中庸言命而命又本中庸故以中庸立名焉中者至正而不偏庸者至常而不易是謂大中至正常久不

易之理理卽禮也卽中庸也故又曰知禮知禮  
卽是知中庸知中庸卽是知天命矣但自其於  
穆無朕而不可窺測者謂命命則疑於虛若不  
言理則恐或墮於空寂以空寂言命豈知命也  
哉自其真實不虛而不可抑遏者謂理理則涉  
於爲若不言命則恐或滯於典要以典要言理  
豈知理也哉故真知命者不假言禮何也雖於  
穆也而實不已本至空也而又至實所以爲真

空耳矣。真知禮者，不假言命何也？雖不已也。而  
又於穆本至實也。而又至空。所以爲妙有耳矣。  
真空妙有，是謂至誠不誠，則無物而何貴於命？  
妙有真空，是謂費隱不隱，則誰費而安得有禮？  
非空虛無用者  
今學者但見老子以禮爲忠信之薄，不知老子  
所病之禮，卽夫子與奢寧儉之禮。先進後進之  
禮，子夏禮後之禮耳。豈知吾夫子有克己復禮  
之禮？顏氏子有博文約禮之禮？須由約而後會。

由克而後復者乎。約而會之則可以反本而得大德之敦化。克而復之則可以立本而合天下以歸仁。此顏子所以能卓然自立而未嘗有所倚也。苟不知禮其何以立天下之大本乎。是故知禮要矣。然所以能知禮與命者以其讀中庸之書而能知聖人之言也。知聖人之言則自能知聖人之人。能知聖人之人則自能知吾心之人。知天下歸仁之人。萬物一體之人矣。我與聖

人天地萬物本無別也。如此知人則禮由此立。命由此出。方可以言君子。故曰不知命無以爲君子也。晉川曰審如此則中庸其至矣。讀中庸者不可以不知言矣。孟子後聖人而生聞而知其言者也。故自謂知言而竊比於私淑曾子。幸而見聖人得親聞其言者也。故述之爲大學而傳之爲中庸以授子思。若夫顏子與之語則不隋與之言則終日無言不悅。未嘗助我今無一

言在焉可悲也夫今所欲知者僅僅學庸諸書之言耳而又不知真自弃其人也夫自畔於禮也夫自絕其命於天也夫卓吾曰知言誠難哉知人誠不易哉仲尼之徒及門者三千最稱穎悟莫如子貢然夫子有莫我知之嘆而子貢不知慚愧反問何謂其莫知子則夫子之爲人子貢不能知之矣是子貢全不知人也猶庶幾望之而又曰予欲無言子貢又不知慚愧復反而

問曰子如不言則小子何述是子貢又全不知言也以子貢之賢尚不知人尚不知言則子貢而下又可知矣吁知言誠難哉人固不易知知言誠不易也哉

聖人言富而可求又曰如不可求蓋言富貴不當求耳余謂聖人雖曰視富貴如浮雲然得之亦若固有雖曰不以其道得之則不處然亦曰富與貴是人之所欲今觀其相魯也僅僅三月

能幾何時而素衣霓裘黃衣狐裘緇衣羔裘等  
至富貴享也禦寒之裘不一而足褐裘之飾不  
一而襲凡載在鄉黨者此類多矣謂聖人不欲  
富貴未之有也而謂不當求不亦過乎曰若言  
富不可求似亦未安今世挾詐行私者恃其才  
力往往從微賤立致富厚此皆唾手而得令人  
歆羨企慕真謂富貴之可以智力求也故吾以  
謂富實可求但人自不當求之耳余謂聖人尊



重自然不肯求人比見世之營營狗狗無所不  
至者心實厭之故發爲不可求之論云耳其意  
蓋曰此皆有命存焉非可以強求而得也故曰  
富如可求吾亦爲之然其如不可求焉何哉今  
子但見世人挾其詐力者唾手即可立致便謂  
富貴可求不知天與以致富之才又藉以致富  
之勢畀以強忍之力賦以趨時之識如陶朱猗  
頓輩程鄭卓王孫輩亦天與之以富厚之資也

是亦天也。非人也。若非天之所與，則一邑之內，誰是不欲求富貴者而獨此一兩人也？邪？姑以大郡庠士論之，其多者或至千，或至八百，卽此八百人者，皆是求富貴利達者也。然至其施金腰玉，多不過三四十人止矣。此三四十人者，以爲可求，則此餘剩七百五六十人者，必以爲不可求矣。果孰爲定論乎？由此觀之，富之不可求明矣。求而不得者，固天也；命也。求而得者，亦天

也亦命也皆非人之所能爲也天則莫之爲而  
爲命則莫之致而至而乃自取羞辱可傷也哉  
夫皇皇求財利如恐後時者細人之事也故曰  
何必曰利亦有仁義而已矣今者身居大人之  
位心有君子之思而屑屑然與細人同其皇皇  
真是可羞或對曰人生處世以財爲命一日無  
財便去不得安得不急但能順其自然行其所  
當然不貪多不爭競於此行財之中卽是行義

之地物我兼得益見其美何羞之有余謂此中亦難言若果有行義之心又本是重義之人則雖終日言利亦是終日行義也但此等之人絕少多是托名行義而實藉以爲利者比之專意爲利者尤爲可羞之甚而方自以爲得計則並賤耳故世之君子只宜抽身財利之外不染不溜乃得脫然無累不得假行義以自托也然世之所以爲財役者亦起於多欲耳心志之欲太

廣耳目口鼻之好無窮故雖匹夫亦不免於聚  
斂也其實一匹之夫一匹之婦衣食之供所費  
幾何本自易足而自不肯足反曰衆生以財爲  
命其沒於財也固宜用健曰此等勢利之人本  
無足言若是聖人安得有一毫利欲之心哉余  
謂此言亦非也夫聖人亦人耳旣不能高飛遠  
舉弃人間世則自不能不衣不食絕粒衣草而  
自逃荒野也故雖聖人不能無勢利之心雖盜

跖不能無仁義之心故伯夷能讓千乘之聖人也聞西伯善養老則自北海而往歸之太公本鷹揚之聖人也時未得志則自東海而來就養於文王皆以爲勢利故也淮陰雖長大而寄食於漂母利也陳平本窮巷而門外多長者車轍勢也以此觀之財之與勢固英雄之所必資而大聖人之所必用也何可言無也吾故曰雖大聖人不能無勢利之心則知勢利之心亦吾人

稟賦之自然矣盜跖至暴橫也然或過孝子之  
廬則不入或聞貞士之邑則散去或平生一受  
其惠卽百計投報之不少忘此皆仁義之心根  
於天性不可壅遏而謂盜跖無仁義之心可乎  
吾故曰雖盜跖亦有仁義之心但就其多寡論  
之於是乎有聖人又有盜跖遂至懸絕耳若五  
分勢利五分仁義便是中人人中人可移而上下  
故習不可不慎習與盜跖居則所聞所見皆盜

一。分。者。皆。天。之。所。獨。厚。仁。義。加。一。分。便。是。中。人。  
上。但。於。仁。義。上。加。一。分。便。不。可。移。而。之。下。蓋。此。  
爲。下。愚。哉。但。於。勢。利。上。加。一。分。便。不。可。移。而。之。  
亦。豈。必。十。分。仁。義。而。後。爲。上。智。十。分。勢。利。而。後。  
友。之。所。係。爲。不。輕。矣。若。夫。上。智。下。愚。之。不。移。者。  
亦。唯。中。人。爲。可。移。此。聖。人。所。以。重。於。習。也。而。師。  
皆。聖。人。而。終。身。遂。爲。盜。跖。習。與。聖。人。居。則。所。聞。所。見。  
亦。唯。中。人。爲。可。移。此。聖。人。所。以。重。於。習。也。而。師。



以上。是天之所以厚上。智而使之不可移也。勢利加一分。便是中人以下。亦是天之所以厚下。愚而使之不可移也。故上智下愚。只爭一分耳。上智雖曰只重一分。然卽此一分。便有泰山之重。不可動搖。矧可移奪邪。下愚之勢利。雖曰亦只重得一分。然卽此一分。便有河海之深。不可傾竭。矧可移奪邪。故曰豪傑之士。雖無文王。猶興自能學。而時習傳而必習也。又曰吾末如之。

何也矣。所謂雖聖人與居不能化而入也。而自然同惡以相濟。積習以至此矣。是亦習也。習之而愈上。不可復下。習之而愈下。不可復上。遂亦各成就。至於十分耳。故曰習相遠也。此又上智下愚不可移者之所習。然也。嗚呼。其初也。本只有一分之差。若不遠而甚近。故曰性相近。而其終遂至於十分差別。一爲聖人。一爲盜跖天淵懸絕也。如此。吾子無他度量。只自度其一分者。

是多一分勢利乎抑多一分仁義乎多則不可移易矣不多而僅僅五分無有輕重是正可移是正可習吾大爲吾子喜之

晉川曰德性問學前輩分作兩事所以有朱陸之辨今言尊德性卽是問學似信不及且德性旣尊一了百當何又有許多枝節廣大精微安在何處溫故敦厚何處下手如此修德只了得自家何便能宜于上下關國興敗旣以身當國

何又得自保其身明哲保身如公似矣又何益  
于天下國家乎終日勤劬手不停披目不廢卷  
問學道矣又安在其尊德性乎多少不知問學  
者其居上爲下或語或默亦自合時而迂闊道  
學執古板任已見激變致念予竊惑焉且今守  
空寂者閉目凝神通不理會學問是又何說而  
號爲道學者又各守門戶以粗心浮氣爲廣大  
以瑣屑細務爲精微以卑已畏人爲不驕以怕

事徇人爲不倍以負氣多言爲興邦以包羞忍辱爲能容以全軀苟免爲保身之明哲又何貴于學而又何益于天下國家也卓吾曰人之德性本自至尊無對所謂獨也所謂中也所謂大本也所謂至德也然非有修道之功則不知慎獨爲何等而何由致中何由立本何由凝道乎故德性本至尊無對也然必由問學之功以道之然後天地之間至尊至貴可愛可求者常在

我耳故聖人爲尊德性故設許多問學之功爲  
慎獨致中故說出許多修道之教中庸一書皆  
聖人修道之教也道問學之事也此道問學與  
尊德性所以不容有二也豈可謂尊德性便不  
用道問學乎正欲人道問學周子批此篇字字可讀以尊吾之德性耳  
是故德性本至廣也本至大也所謂天下莫能  
載是也而又至精焉至微焉精則虞廷之唯精  
微則虞廷之唯微而中庸亦曰夫微之顯曰莫

顯乎微其所以狀吾德性之精微者至矣極矣  
夫廣大也而又精微不可以見吾德性之尊乎  
德性本至高也本至明也雖昭昭之天不足以  
比其明蒼蒼之天不足以擬其高者也而又至  
中焉至庸焉中則無東西南北之可擬無方所  
定位之可佳是故不得已焉強而名之曰中中  
則人皆可能誠則本自無息所以爲萬世不易  
之常千古不朽之德者在是非庸而何夫高明

也而又中庸又不可以見德性之尊乎德性之  
來莫知其始是吾心之故物也是由今而推之  
於始者然也更由今而引之以至于後則日新  
而無敝今日新也明日新也後日又新也同是  
此心之故物而新新不已所謂日月雖舊而千  
古常新者是矣日月且然而況于德性哉其常  
故而常新也如此又不可以見德性之尊乎博  
厚如地雖足爲厚未足比吾德性之厚也是猶



爲自上而之下也更由下而之上則可以築九  
層之臺也可以造凌霄之宮也可以建凌雲之  
閣也所謂彌堅而愈不可鑽又極高而愈不可  
仰者矣何其所厚者愈敦愈固其所謂禮者又  
日隆日崇乎是謂忠信之足以進德也充實之  
可以光輝也敦化之自然川流也德性之尊又  
不可見乎合而觀之皆德性也而人不知所以  
尊之是故有道問學之功焉苟不知問學之功

則廣大誰爲之致精微誰爲之盡高明誰爲之  
極中庸誰爲之道而所以溫所以敦又誰爲之  
哉故聖人重問學焉重問學者所以尊德性也  
能尊德性則聖人之能事畢矣於是焉或欲經  
世或欲出世或欲隱或欲見或剛或柔或可或  
不可固皆吾人不齊之物情聖人且任之矣故  
曰以人治人若夫不驕不倍語默合宜乃吾人  
處世常法此雖不曾道問學而尊德性者或優

爲之故聖人之意若曰爾勿以尊德性之人爲異人也彼其所爲亦不過衆人之所能爲而已人但率性而爲勿以過高視聖人之爲可也堯舜與途人一聖人與凡人一自今觀之文王非大聖人乎姜里之囚身幾不保雖文王亦有時而不知默之足以容也幸而有散宜生輩獨出奇計脫西伯於虎口然身雖幸免又不免陷君于不義矣且夫子自謂居上不驕是也夫居上

猶不可驕也。況隱而在下者乎。然孺悲不見足矣。胡爲乎取瑟之歌。陽貨不拜足矣。胡爲乎瞰亡之往。謂夫子爲驕固不可。謂爲不驕吾亦未敢信也。以此見聖人若論處世亦多有不合衆人議論處矣。然亦何足以窺聖人而又何足以病聖人乎。獨保身之云。明哲之云。學者似未可遽以藉口也。蓋此謂危邦不入。亂邦不居者云耳。若旣食君之祿。仕人之國。則國爾忘家。公尔

忘私其義也。豈可嘿嘿以取容而曰我欲爲明哲乎？且夫子又不曰臣事君以忠，事君敬其事而後其食。事君能致其身乎？彼道學者獨竊此以自文，是賊道矣。噫！欲處世而身致治平者，恐別有經綸之學在，未可以大學之道爲迂緩而不講也。方今

聖天子在上，賢公卿在下，食祿任職，報主竭忠，保身之說，非但不可言之於口，而亦不可萌之

於心若有此心便是不忠此何時也豈春秋時  
邪夫子不幸而當其時故惓惓以明哲爲言然  
比干剖心夫子且大以爲仁豈可遂謂夫子好  
明哲而復責比干以不能保身歟況今又何時  
矣只可責食祿者或未嘗有尊德性之功則可  
苟能尊德性矣而曰不能委身事君者未之有  
也大抵身家之念重則君父之念輕或名義之  
念重則君父之念亦輕雖有高下其爲不念君

父一也。以故情義不通。上下間隔。古今皆然。誰肯自任其咎乎。此尊德性之功。所以不可不亟也。若力小而任不稱。季高而志昏惰。苟不知歸。則貶斥隨之矣。此於明哲本無交涉也。大抵中庸一書。專言尊德性之事。此則堯舜以來相傳之學。夫子不能異也。大學一書。專言大人之學。雖庶人亦未嘗不明明德於天下者。此則夫子獨得之學。千古聖人不能同也。

懷林曰若說大學正心是聖人明心之圖則論語言有知無知亦是明心圖矣今聖人曰吾有知乎哉是以有知自疑也曰無知也是又若以無知自信也有知無知皆不敢知如此何以故蓋若說我爲有知歟則鄙夫有問我實空空如而若無一知識在心者似若不足以答鄙夫之問也若說我爲無知歟則扣兩端而與之竭雖我又不知其從何而來矣然則謂我爲有知不



可也。謂我爲無知，亦不可也。此亦夫子明心之圖也。果然否？余謂若如此說，則夫子到處皆是明心，以示人者，蓋心原は無方所之物，故不可以有所而求，又不可以無所而得心，亦原は無知識之物，故不可執以爲有知，亦不可執以爲無知。唯在人默而識之，則知有所無，所有知無知，真何有於我也哉。

天下之事，各義則已。故聖人曰：義之與比，則君

子之於天下也義以爲質焉盡之矣何故又說  
禮行又說遜出又說信成不旣贅乎曰單言義  
則四德皆具故義爲總名如乾之有四德是也  
今各舉言之正所以盡義之用耳夫天下之事  
固有在我以爲宜而在彼或不宜者則禮不順  
矣禮者人人各具人人不同若滿堂宴笑而一  
人獨有向隅之泣亦未爲各得其所也故必禮  
以行之而後彼我皆得衆志皆洽旣得而洽之

矣。若顯然自以爲功，是不遜也。故必遜以出之，而讓美與人。吾不見其爲美也。推功與人，吾不知其爲功也。則無義之名，無禮之名，是謂委曲遜出，令人不覺。斯善矣。若此者，蓋出自真心，本自實意，成始成終，表裡若一，是主之以忠信也。豈不君子其人哉！蓋天下唯讓德爲難，故夫子曰：能以禮讓爲國乎？何有？由也不讓，是以哂之。蓋能讓則天下無復事矣。今觀夫子平日唯說

當仁不讓而已可知當仁之外更無一事不當讓也自今觀之伯夷泰伯宜有國者也此二子之義也然太王有欲立季歷之心孤竹君有欲後叔齊之意二子若執嫡長以爲義則太王孤竹之心不遂而二子欲順太王孤竹之禮拂矣故決之於禮則泰伯決不宜承宗廟之統若顯然推之於季歷則恐太王或未安此委曲以從禮尤人子所難者故至於披髮佯狂逃竄蠻荆

使李歷有得國之實太王無欲傳之名而泰伯  
又無讓國之迹此義之盡而禮之精委曲遜讓  
天下不識古今不識非伯夷所可望明矣伯夷  
只可言讓不可言能讓非遜也須是連讓亦讓  
方是遜然此只就讓國一事言之耳凡事皆然  
寧獨讓國若子房借漢祖以爲韓義也而卒竭  
謀以成漢祖之業則禮之行也符於義終焉辟  
穀不食而辭萬戶之封則遜之出也協於禮終

始一心誠信無僞故漢祖獨深信之而不疑  
嗚呼此非君子處世之大法哉使韓信當其時  
卽能讓王而取淮陰又何有赤族之慘邪或曰  
淮陰當季非但不讓亦且無禮矣假王之請於  
禮何在余謂淮陰非但無禮亦且無義矣固陵  
之約信已不至非漢祖聽畱侯之說先封爵邑  
則垓下之事未可知也故一得則四善兼得一  
失則連義亦失讓其可少歟孟子曰辭讓之心

禮之端也。則讓乃禮之大者。古今天下以讓而得。以不讓而失者多矣。嗚呼。可不讓歟。讓又是美德。又可以不讓歟。連讓亦讓。始爲泰伯。始爲遜。出嗚呼至矣。盡矣。無以復加矣。萬全無患矣。眞實有利矣。

關雎之詩。未得則展轉反側。寤寐思求。其神傷也。旣得則鐘鼓琴瑟樂之。不厭其樂。淫也。夫子反曰。不淫不傷。何哉。曰。此卽有慟乎之說也。非

夫人之爲慟而誰慟然則關雎樂之淫也而自  
不得謂之淫哀之傷也而自不得謂之傷矣  
今之言政刑德禮者似未得禮意依舊說在政  
教上去了安能使民格心從化也彼蓋但知禮  
之爲中齊之爲齊中則不可使人有過不及之  
差齊則欲齊人之所不齊以歸于齊夫天下至  
大也萬民至衆也物之不齊又物之情也中無  
在又孰能定其太過而損之定其不及而益



之也。若一一而約束之，整齊之，非但日亦不給。依舊是走在政教上去矣。彼政教之所以不能使民格心歸化者，正以條約之密，無非使其就吾之條理而約之於中，齊其不齊而使之無太過不及之病也。是欲強天下使從已，驅天下使從禮人，自苦難而弗從，始不得不用刑以威之耳。是政與刑自是一套，俗吏之所爲也，非道之以德者之事也。然不知是如何乃爲道民以德。

者之禮乎禮又如何去齊得他若曰齊其所不  
齊則強其所難拂民之性如何便肯格心余謂  
此問極好此疑極是蓋道之以德則爲民上者  
純是一片孝弟慈真心旣以其躬行實德者道  
之于上則爲下者旣自恥吾之不能孝弟與慈  
矣而上焉者又不肯強之使從我只就其力之  
所能爲與心之所欲爲勢之所必爲者以聽之  
則千萬其人者各得其千萬人之心千萬其心

者各遂其千萬人之欲是謂物各付物天地之  
所以因材而篤也所謂萬物並育而不相害也  
今之不免相害者皆始於使之不得並育耳若  
肯聽其並育則大成大小成小天下更有一物  
之不得所者哉是之謂至齊是之謂以禮夫天  
下之民各遂其生各獲其所願有不格心歸化  
者未之有矣世儒旣不知禮爲人心之所同然  
本是一箇平變萬化活潑潑之理而執之以爲

一定不可易之物。故又不知齊爲何等。而故欲  
強而齊之。是以雖有德之主。亦不免於政刑之  
用也。吁。禮之不講久矣。平天下曰。民之所好好  
之。民之所惡惡之。好惡從民之欲。而不以已之  
欲是之。謂禮禮則自齊。不待別有以齊之也。若  
好惡拂民之性。菑且必逮夫身。况得而齊之邪。  
中庸言明善誠身。又曰擇善固執。大學言知止  
能得。又曰知至意誠。雖以顏子之學。亦止曰擇

中庸而得一善則拳拳弗失而已然則學問之道知及仁守盡矣何故又說莊以蒞動以禮乎曰此謂臨民動民者言也臨民則有上下之分不莊則民慢而上下無體動民則有教學之益非禮則不當而教學難施故雖知及仁守於己所學有實造矣若槩以簡易佚樂臨之謂無事可以坐致太平謂酣醉偃臥可令齊國東海大治此則子桑伯子之簡夫豈不可然其使人不

敬何哉故曰無爲而治而又曰恭已南面也至  
於教學相長全要因材而篤所謂禮也若可以  
語上而不語不可以語上而又與之語皆違特  
失幾不中禮矣故曾子能唯卽呼而告之一貫  
子貢能疑故設以多學多識而使之自然自非  
此皆吾夫子動人以禮處所謂相時而動不累  
學人者也唯顏子一人則克已復禮之訓博文  
約禮之訓不一而足

志道據德依仁游藝何謂也曰此卽知而好好而樂之謂也夫志於道則志有所在而不遷矣猶未得也得則謂之德有得則可據之以爲守然猶恐其或奪也仁則由中以發外本是吾之固有吾但依而行之足矣夫豈他人所能奪而吾據而守之邪然曰依則尚見有仁曰仁則尚見有已未忘也夫雜物撰德皆仁之地百爲泛應皆仁之施何莫非仁者而乃依仁也邪故曰

用應酬但有藝事出往游衍但與藝游無他道也無他德也無他仁也所謂兩忘則自然好而樂之矣故曰好之者不如樂之者孔子樂在其中顏子樂而不改者此也所以尋仲尼顏子樂處者尋此者也嗚呼盡之矣

大學釋誠意卽首言如好好色如惡惡臭蓋卽此以比好惡之真實不欺處使人知此是誠意誠卽實也知此是獨知獨知卽自不敢欺也不



欺則意誠矣。不欺已則慊於己。不欺心則慊於心。不欺人則自不至於消沮閉藏而無惡之可  
拚矣。不患千目而視千手而指矣。而何有於十  
視與十指邪。何等安閒何等自在。心亦由此正  
身亦由此修。所謂一了百了者是也。而其原只  
於不欺此獨知之一念耳。一念之動者意也。意  
之誠邪。不欺邪。吾獨知之。而天下之人亦皆知  
之。後世之人亦皆知之意之不誠邪。自欺邪。吾

獨知之而天下之人又皆知之。後世之人又皆知之。何也？善眼以此意之同也。故卽此獨知之中。實爲天下後世同知之地。痛切旣爲天下後世之所同知。而又何以欺爲邪？而又烏用欺人爲邪？是以治平君子舉此加彼。不難矣。孟子告齊宣曰：王母以好色爲疾也。王唯真知吾之好色。則一國之男女皆得所矣。母以好貨爲疾也。王唯真知吾之好貨。則一國之衣食皆有餘矣。又母以好

勇爲疾也。王苟真知吾之好勇，則一怒而一國之民舉安。民唯恐王之不好勇矣。比類而推，王若無疾，則已。倘別有他疾，皆是自獨知而來，皆是自真真痛切心意所發而來，不肯一毫瞞人者，非意誠而何？夫人正賴有此實意，有此真知，故能推以及人，與人同其好，與人同其惡，便是王政了矣。使齊王自以爲疾，而欲去之，又安肯容人之疾，而又安肯容百姓之疾邪？旣而自已之疾痛切

痛切

又不能去終不免瞞昧以過日百姓之疾又欲如法以去之而曰尔何以好色好貨好勇而犯吾之所疾惡爲也吁豈非起於自欺之一念而意不誠之故哉故君子莫先於誠意焉意誠則有可推之地由此而齊家治國平天下直推之而已故能推卽是修身推之以及人卽是齊家治國平天下之功效再無別有修之功齊之功治之功平之功也好者推之以同其好通天下

亘萬古此好同也惡者推之以同其惡通天下  
亘萬古此惡同也故意誠則推之自有餘矣推  
之者強恕之道也取譬之道也勿施之道也絜  
矩之道也故夫子不許子貢以無施而自謂慥  
慥君子唯在真知吾之未能而不敢不勉焉則  
聖人亦猶人也無自欺而已聖人之治平無異  
術也亦唯善推其所謂毋自欺者而已則無自  
欺要矣意誠本矣獨知之知之不可欺甚矣然

而人終不免於欺此獨知者何哉則以不知此  
知之真實故也故大學言誠意而必先之以致  
知嗚呼致知焉盡之矣

右十八章

道古錄卷下

舜好問已矣而又好察好察是矣而所察者又是其極邇之言謂之曰好問則自四岳九官十二牧以至芻蕘工瞽無不好問可知也而未必皆其所好察也唯是街談巷議俚言野語至鄙至俗極淺極近上人所不道君子所不樂聞者而舜獨好察之以故民隱無不聞情僞無不燭民之所好民之所惡皆曉然洞徹是民之中所

謂善也。夫善言卽在乎邇言之中。則邇言安可  
以不察乎。曰。察則不止於問。曰。好察則不止於  
好問。然則聖人之於邇言善矣。夫唯以邇言爲  
善。則凡非邇者必不善。何者。以其非民之中。非  
民情之所欲。故以爲不善。故以爲惡耳。非真如  
今人所謂妨政蠹民之惡也。旣知其爲惡。則隱  
而置之。不復用。旣知其爲善。則揚而舉之。以用  
其中於民。隱惡揚善。兩端之執也。用中於民。聖



人無中<sub>看</sub>以民爲中也。夫民之所欲，天必從之。況居民上而爲天子者哉？天之立君，所以爲民。舜唯日夜思所以用民之中，俾之無有失所欲者，安得而不遑遑焉？而唯邇言是察也。邇言者，近言也。察言者，止於近言，何以成智？又何以成大智？蓋言而曰近，則一時之民心，卽千萬世之人心。而古今同一心也。中而曰民，則一民之中，卽千萬民之中。而天下同一民也。大舜無中而以

百姓之中爲中大舜無善而以百姓之邇言爲善則大舜無智而唯合天下通古今以成其智夫智而至於合天下通古今也其謂小智乎大智乎當自知之矣故曰舜其大智也與

索隱則智者欲其過行怪則賢者欲過之既隱既怪自然與世不同自然超出尋常之外天下後世自然有稱述之者矣故夫子曰吾弗爲以其用心於不必用之地無益於百姓之日用也

日用者中庸也。本無名而又烏用有述爲哉。然天下之事非名則誰述。無述則誰爲。故君子雖以學道爲事。遵道爲功。然旣無赫赫之名而能淡然不厭者鮮矣。此又不免半途之廢矣。故夫子曰。吾弗能已。以此自學。則不敢厭。以此誨人。則不敢倦。若賜之願息。求之自畫。我無是也。我唯依乎中庸而已。循吾未發之中。執吾不易之庸。雖無有一人稱述我者。直至於遯世而不我

知也。我亦不因之自悔而遂廢於半途。此則夫子之事。而夫子不以自居。故又曰。唯聖者能之。意蓋曰。必如是而後爲君子之能依於中庸也。然而未可以遽責之君子也。必也聖人乎。所謂并天下之至精。不足以與此。精則隱怪不能惑矣。非天下之至健。不足以與此。健則半途不能廢矣。非天下之至神。不足以與此。神則出有入無。窺乎太始而能爲天地之先矣。此雖至平常。

至簡易爲百姓之所與能而非聖人則決不可  
能者故曰唯聖者能之

旣說唯聖者能則不必曰中庸不可能蓋唯中  
庸不可能故非聖人則必不能聖人之能能其  
所不可能者耳今天下之事凡可以容吾力者  
人無不竭力以爲之如天下之均爵祿之辭白  
刃之蹈此皆世間第一等難能之事然以天下  
之衆而能使之均平若一人以天下之大與之

而不屑受此固難矣猶謂所重者身耳至於白刃之蹈則生死且不顧身亦度外物矣卽此三者人皆可能可見天下無不能之人人無不能之事凡稍可致力人爭勉焉則以可能故也若中庸者費矣而隱旣已隱則雖神眼不能窺微矣又顯旣已顯則雖神力莫能遏其柰之何哉故曰不可能也又曰中庸其至矣乎民鮮能久矣又曰雖聖人亦有所不能焉蓋世人但知百

姓與夫婦之不肖不能而豈知聖人之亦不能也哉以故告之曰爾勿謂聖人能是也自我言之聖人所能者夫婦之不肖可以與能勿下視世間之夫婦爲也此一與字下得甚妙若說夫婦所不能者則雖聖人亦必不能勿高視一切聖人爲也此一雖字下得又甚妙蓋道有至者中庸則道之至也至則決不可以智力勉強而能故說莫能載莫能破上下察等若曰非但聖

人所不能也。雖天地亦且不能。若不極言其至  
非但夫婦可與能也。雖微而鳶魚。察而飛躍。皆  
可與能之耳。以此觀之。彼天下之均爵祿之辭。  
白刃之蹈。皆極其力之所可能。鳶魚類耳。夫婦  
等耳。曷足怪哉。是又安足道邪。莊生謂塵滓糝  
糠。陶鑄堯舜。豈荒唐語邪。正與先正堯舜事業  
一點浮雲過目相合。

聖人言知必言行以見行。不離知。言行必言知。



以見知不離行其曰道之不行也我知之智者  
過而愚者不及由不明故不行道之不明也我  
知之賢者過而不肖者不及由不行故不明知  
行相須蓋可知矣然則陽明先生知行合一之  
旨實出于此世間一飲一食莫不皆然雖有嘉  
穀不食不知其旨非先行之旨何由知既知其  
旨安肯不食乎唯是二種人坐在飯蘿之中強  
作聰明富貴之相以爲此常飯耳貧乞人之食

吾安能食。務求奇品異味而奇異又卒不可得。遂餓而死。此一種也。所謂賢者智者流也。亦以不行故不得知。不知故不肯行。是自爲過。非飯罪也。又一種者。亦坐在飯蘿中。妄以爲毒物所留。寧餓而死。不敢輕嘗。是謂至愚。至不肖。不知不行。不行不知。交相瞞者也。吁。嗟。使無此二種人。天下豈不皆飽煖之夫哉。是以中庸之道終莫之行。莫之明者。以此。

聖人以擇中庸而能服膺弗失者爲大賢上士以擇中庸而不能期月守者比之驅人於罟獲陷阱而不知避如禽獸貪夫犯死不顧夫中庸何物也擇而守之則生不知擇而守之則遂自納於死豈非謬與今之不知中庸者衆矣何以不入於阱也余實思之而未得釋氏動以生死恐嚇人曾謂吾聖人亦言生死乎意者夫子十五便志學五十猶學易正謂陷阱在前當思所

以急避之邪不如是戒慎恐懼臨深履薄恐此  
身出不得善是以比之禽獸比之貪夫比之網  
罟比之牢獄令人早依於中庸耳矣非不義而  
言之太甚也余實不知中庸之可以免死因書  
之以請教四方之講道學者

道本不遠於人而遠人以爲道者是故不可以  
語道可知人卽道也道卽人也人外無道而道  
外亦無人故君子以人治人更不敢以己治人

者以人本自治人能自治不待禁而止之也若  
欲有以止之而不能聽其自治是伐之也看是欲  
以彼柯易此柯也雖近而實遠安能治之安足  
爲道也邪然其所以不能以人治人者由其不  
能推己及人耳故說忠恕中心爲忠自己不容  
己之實心也如此中心爲恕自己不容二之初  
念也所謂施諸己而不願則勿以施之於人是  
也不願者中心之實也勿施者如心之推也如

是則自能以人治人而不忍執柯以伐之矣。忠恕非道也，而可以近道，故曰：違道不遠。夫道者，無人無己，何待於推？有推則猶見有己於道，尚遠，但須由此進之耳。既能推己及人，以行吾強恕之功，則自能以人治人，自妙夫無爲之化。然世又有不能推己及人者，則以不知反己自責之道耳。故夫子曰：君子之道，丘未能一。歷數子臣弟友而皆曰：吾實不能。何敢責人爲邪？學者

既不知平常倫理人實難盡反以聖人爲致謙  
於是乎明於責人暗於自責身陷於言行相違  
之失而不自知況能推己以恕於人邪不知夫  
子是真實語是以不敢自足而唯日孳孳不敢  
放言而唯恐或盡卽此是相顧卽此是慥慥卽  
此是篤實君子皆自一念反己自責之心爲之  
也是以中心平恕而自然有可推之地也  
旣說以人治人則條教禁約皆不必用聖人何

以又說修道之教曰修道便是教以人治人便是修道中庸一書皆教也皆恐人不知道不離人○周○此○一篇俱是至理人不離道而欲遠人以為道於是乎愈修愈遠愈治愈不治故說道不遠人而欲以人治人○看○也然非知道者終不能修道非學以知人者終○看○不可以治人或曰若如此則我與百姓咸相安于無事豈不是至治之世無為之極垂衣之朝然如何行得夫民生有欲無主乃亂强凌眾暴



誰能靜之、一日無法、則一日不治、雖以舜爲君、  
恭己南面、坐享無爲、亦必有九官十二牧、代天  
之工、今何言治之之易也、曰、子但知舜有九官  
十二牧、以代天工、而不知九官濟濟、相讓九官、  
諸臣亦無爲也、禹掌治水、家門不入者三、呱呱  
弗子者、其年八、而能順水利導、不與水爭地、行  
所無事、禹無爲矣、稷掌教穡、因地之利、稷無爲  
矣、契掌五教、敬敷在寬、契無爲矣、益掌工、虞能

使草木鳥獸咸若益亦無爲矣獨一皐陶明五  
刑以弼五教而曰辟以止辟似不免於殘民者  
今觀舜之稱陶曰皐陶邁種德措刑不用黎民  
懷之則皐陶亦何爲之有由此觀之舜之君臣  
俱熙皞休享于無爲者獨四凶之誅說者謂其  
大不及堯則甚有理故夫子以天配堯以君稱  
舜君則只於有天下而不與天則蕩蕩焉民莫  
能名矣其爲絕遠實天之與淵然今觀縣之極

也甚無謂也。以禹爲子而又有平水土之大功。夫禹之功萬世永賴者也。鯀之罪九載績用弗成者也。獨不可以其萬世之功原其九載弗成之績乎。堯旣能從容以聽之於九載。舜獨不爲禹念其親非情也。然則堯之化遠矣。故夫子言篤恭至於聲臭俱無而後爲至。而後爲不顯之德。而後可以刑百辟。平天下。若猶有聲色者存。則雖曰不大亦末耳。此可以語治人之理矣。是

故不見而章者在不動而敬者在不言而信者  
在不賞而勸者在不怒而威者在不顯而儀刑  
者在不聲不色而化民者自在是謂篤恭而天  
下平非玄也亦非禪也是吾夫子之言也倘若  
出自我口入自汝耳則必笑罵叫號目爲玄言  
禪語不可以垂訓矣曰子所云以人治人似也  
何舜以下夫子皆不以無爲許之三代以降幾  
人曉了此旨而亦以治何邪其亦資性有偶合

者邪。今之學者，終日談學，何以不聞談到此也。余謂百世無善治，千載無真儒，此二語，昔人已極談之矣。第談者未必用，用者未必知，談以是相左，孤負聖人學庸諸書耳。非絕不談也。若漢祖之神聖，漢文之明聖，直與放勳暗合，未嘗知學問也。卽令極意問學者，亦安能及之哉。是謂天性至到，聰明超詣，非常遇也。曹相國舍中堂以奉蓋公九年，而齊國安集，汲長孺病閨閣不

壞一鑪七季而淮陽政清皆天資近道無爲而  
理非學所加者亦可貴也夫栽培傾覆天必因  
材而況於人乎強弱衆寡其材定矣強者弱之  
歸不歸必并之衆者寡之附不附卽吞之此天  
道也雖聖人其能違天乎哉今子乃以強凌衆  
暴爲法所禁而欲治之是逆天道之常反因材  
之篤所謂拂人之性災必及其身者尚可以治  
人耶故誠意貴矣誠意則好惡合天是故不可

以不知天誠身要矣誠身則天人一道是故不可以不知人是故大學言誠意必先致知中庸言誠身必先明善也善明則身自誠而成已成物時措之咸宜無假借也知至則意自誠而好奸惡惡到處皆自慊無造作也是故欲治人者必以知道知人爲先不知人而能治人者鮮矣不能治人而能自治者未之有也

古人不出戶而知天下不窺牖卽見星斗非謬

語也夫星斗至高也不待窺牖而可見天下至  
遠也不待出戶而自知是近之未始不遠遠之  
未嘗不近也卑之未始不高高之又未嘗不卑  
也使近而不遠則誠近矣何取於近遠而不近  
則徒遠耳又何貴於遠邪唯其近而又遠遠而  
卽近卑者又高高者卽卑此自邇自卑之論也  
蓋言其未嘗有遠與邇高與卑也若果有卑高  
遠邇如四維上下之不可易然則亦四維上下



焉耳。非所以論於君子之道也。故夫子旣引詩而復以父母其順乎結之。夫吾妻子之樂兄弟之翕本非所以爲順。父母計也。而父母自順則道固有不<sub>看</sub>行而至無壅而升者。一讀詩而可知也。而謂父母爲遠。必須自兄弟妻子之邇。以至之可乎。是不通之談也。而謂必先和吾之妻子以及吾之兄弟。而後求順吾之父母。循序以進途焉可乎。是又不通之論也。此自邇自卑之說。

也。蓋言邇之可遠，邇之卽遠。君子之道，自邇足矣。不必極遠也。自卑足矣，不必窮高也。

記者謂夫子不語神，而中庸乃盛言鬼神之德之盛，雖視之不見，聽之不聞，而實則體物而不遺，故能使天下之人齊明盛服，以承祭祀，駿奔走執豆籩，洋洋乎如在其上，如在其左右，儼若對越，肅若陟降，而或見之者焉。夫不見不聞至微也，而能使天下歷萬古之人自然畏敬奉

承拜而禮之。祀而祭之。則其體物不遺之驗。又甚顯也。微而又顯。顯而實微。鬼神之爲德。不旣盛乎哉。故其詩曰。神之來也。無方旣不可以私心圖度。而遽以爲有。而神之應也。如響。又自能使人不可以厭。歎不敬而遂謂之無。然則鬼神信非虛也。鬼神信非誣也。夫子之語神也如此。彼謂其不語者。直記者之語耳。記魯論者。又是何人多。其曾子與有子之門人也。夫神爲不測。

故緩詞不足以盡神鬼爲難知。故顯詞不足以  
道鬼。此唯曾子得聞之。雖有子尚不知其得聞  
與不何如也。而可使其門人弟子聽之哉。而可  
與其不可與語者語之哉。則其謂夫子之不語  
神也固空。

曰鬼神之道幽遠難明。非但有子不得聞。卽子  
路亦未之聞也。季路問事鬼神。而夫子不語。但  
告之曰。爾且未能事人。安能事鬼乎。夫當時之

所謂人者果孰有過於夫子也。正名之告直以  
夫子爲迂而不聽則其不畏天命狎大人而侮  
聖言甚矣。安在其能事人也不能事人安能事  
鬼便是直語以事鬼之道非不語之也。何也。人  
鬼一道不能事人以故不能事鬼則凡不能事  
鬼者便是有鬼神而不信其赫然臨之在上質  
之在傍也。又豈有能事人之理哉。然則今之所  
謂能事人者事勢也。非事人也。真能事人則自

周○批○忠○信○可○孚○豚○魚○

能事鬼矣。故唯大聖人爲能事鬼。則以大聖人能真事人。故也。今觀夫子之言曰。吾若有他妨。而不得與祭。是卽不祭。是卽慢神。吾不敢也。是故祭先先在。祭神如神在。凡鄉黨一書。所以紀聖人之事神者詳矣。雖以鄉人之儻鄙。俚俗惡聖人。亦必朝服焉。自阼堦以臨之。若曰。是皆有神明在。鄉人所爲禱祀而祈禳者也。敢不敬與。唯是祭不欲數。數則煩其慢神也。滋甚。又不欲

瀆瀆則諂其慢神也益甚故曰敬鬼神而遠之  
唯是春秋二時乃修其祖廟陳其宗器設裳衣  
而薦時食蓋敬神也恐煩神也又曰非其鬼而  
祭之諂也如魯之郊禘季氏之旅泰山王孫賈  
之欲媚竈皆諂之也大不敬也神其享之乎故  
又曰曾謂泰山不如林放乎林放知禮之本深  
知夫子所大是以抑揚言之言泰山之神不可  
以非分而求本欲求福吾恐其反速之降殃也

大不可也。又非林放者比也。卽夫子此言觀之。則泰山爲有神乎？爲無神乎？如其無神，祭之何益？如其有神，可妄祭邪？故夫子曰：我戰則克，祭則受福。然則國之大事，在祀與戎。蓋自有天地以來，直至今日矣。有此天地，卽有此人鬼；有此世界，卽有此賢聖；有此賢聖，卽有此祀典。使其無神，聖人何謂而制此祀典，以貽萬世？設使一聖人者，作聰明以舉之于前，後來千聖相繼，獨



無一人見其不可乎。卽聲言以辨其爲惑。世誣  
民正。所以見其不苟同者。何以愈。經後王而祀  
典愈備也。今之學者言及鬼神。則以爲異端。釋  
老之教。小言之則以爲恥。大言之則斷以爲狂。  
然自入仕以來。一入公門。則必先祭門。而後敢  
入。祀土地神。而後敢坐。不先齊宿於城隍。仍爲  
文以告於城隍之神。則不敢遽坐政事堂。而聽  
政。則自九卿百執事而下。以至郡守邑令諸大

小官固不皆然矣。何獨無一人明其不然者。毀神像而惜此牲醴之供也。不但是也。春秋二丁先聖先賢報本反始似矣。若夫山川社稷之壇風雲雷雨之壇無祀厲鬼之壇則自上元清明以至初秋霜落冬寒陰氣慘慄之候無不有祭。祭又必遍於各里各鄉各村各社。不太煩乎。此何義也。今之官者雖不敢廢祀。然亦故典焉耳。非但既灌而後乃不足觀。披倚臨祭神亦吐之。

矣。寧獨諸壇卽以夫子言語童而習之以取功名富貴而兩廡爲馬糞之巷牌次爲廚庖之版矣。藐然不理。是尙能事人乎。中間有真實愛民者。蠲潔牲醴。齊戒必明。山川鬼神自降之。福化災爲祥。厲不作殃。歲時豐稔。民日以寧。而是等反笑之。以爲拙癡。之。以爲太認真矣。然是等也。平居無事。則慢神而虐民。小小疾病。細細驚惶。卽求神問鬼。禱祀並作。雖淫祠妖魔祀典不載。

者亦哀求之萬端也。其最信神信鬼者則又莫如此等輩。不亦可笑之甚。與故聖人之祭以受福而世人之祭以致禍。則不能事神之故可知已。夫唯聖人能事神。故其敬之也專。夫天命玄鳥降而生商。何其誕也。而聖人以爲至祥極瑞。筆之於經而不刪。若在今人必且吐噓棄之矣。帝賚良弼。說築唯肖。何其誣也。而武丁卽以爲上聖大賢。爰立作相而不問。若在今人必且交。

章彈劾而以死諍之矣。此無他。不知人故也。不知人。由於不知天。故曰。質諸鬼神而無疑。知天也。此非至誠如神者。又孰能知之。故又曰。神以知來。又曰。原始反終。故知死生之說。故知幽明之故。故知鬼神之情狀。一實理之自然。一直誠而不可掩也。如此。非誕也。非誣也。特心非至誠見滯。凡近。遂怪之。不信。執之以爲誕。且誣耳矣。嗟嗟。執無鬼之說者。卒爲鬼所拷而不知。作無

佛之論者因爲婦所譏而後省古今迷人大抵然矣而何足以費吾喙

君子所以無願外之念者以其能素位也所以能素位者以其無入而不自得於已也若無自得之益則見內輕見外重而能不願外者未之有矣既願外安能素位故君子之心自得焉耳矣今夫貧賤我素有也一旦而居乎富貴之位則視富貴又若素有然而行乎富貴之所得行

初不見其身之從貧賤來也。今夫富貴我素有也。一旦而居乎貧賤之位。則視貧賤又若素有。然而行乎貧賤之所宜行。初不見其身之從富貴來也。以至患難夷狄。莫不皆然。平居無事。初不知有患難也。卒然而立於患難之地。則患難與居。若素患難。然不以爲異也。素居中國。初不識有夷狄也。卒然而入於夷狄之鄉。則夷狄與同。若素夷狄。然初不知其爲中國人也。夫富貴

貧賤患難夷狄皆位也而視之若素則易位而安而自無願外之想富貴貧賤患難夷狄皆外也而外者不入則無入不得而自無出位之思故君子欲其自得之也苟自得又何往而不可哉居上居下處已處人皆可知矣曰昔人謂光陰者百代之過客又謂人生如寄多憂何爲此莊生之所以稱達也今夫子言素位則步步皆實際似與莊生等所見不同余謂前聖後賢皆



重、在、自、得、上、其、自、得、同、則、所、言、自、無、不、同、者、苟、  
無、自、得、之、妙、則、視、之、如、傳、舍、亦、一、時、影、響、之、見、  
自、解、之、意、耳、履、之、如、實、地、亦、一、時、氣、質、之、強、好、  
勝、之、私、耳、非、孔、子、莊、子、本、旨、也、今、觀、夫、子、視、富、  
貴、如、浮、雲、寧、獨、傳、舍、莊、生、魚、樂、於、濠、梁、之、上、貧、  
賤、若、曳、尾、之、龜、其、爲、素、位、亦、已、極、矣、扶、杖、逍、遙、  
與、逍、遙、御、風、何、殊、百、代、過、客、乎、觀、人、間、世、以、應、  
帝、王、步、步、皆、實、詣、寧、獨、吾、夫、子、教、人、素、位、哉、故、

學者須得聖賢自得之益苟自得縱不同亦何妨也

哀公一小國之君也兼是昏弱太甚之君不足與言矣就使有問當對亦豈無別方便接引之語而卽告之以九經語之以誠明九經則自修身尊賢親親而推之以至於柔遠人懷諸侯誠明則詳之以博學審問知天知人以及於人一己百人十已千弗得弗措焉此皆聖人平天下

之事功、夫豈哀公之所能辦也。余謂夫子非告  
哀公也。所以告諸弟子也。正所以教天下萬世  
之爲人君者也。特因哀公之問而遂發之耳。縱  
春秋之天下無一人能知而行、萬世之天下終  
無有一人能知而行之者邪。則夫子之教在也。  
今觀大學一書所言平天下之道備矣。是皆自  
問自答、自唱自和。雖弟子亦不待其問而遂自  
言之。況國君有問、猶謂發之有端。夫子安能以

已也。邪。大抵聖人之人。千萬世合爲一人之人。  
也。故不在天下。則在萬世。非世人一人之人所。  
可比也。旣不得而比。而又烏得而知之哉。大學  
言。古人欲明明德於天下。余謂吾夫子欲明明  
德於萬世。

盡性之道。唯至誠能之。蓋性盡則洞徹到底。不  
畱一塵矣。故曰。盡性。性盡則人性亦盡。物性亦  
盡。何也。人物與我同一性也。若猶見有人猶見

有物未爲能盡其性也。性盡則化育在我。參贊自我何也。天地與我同一性也。若化育不自我參贊不自我猶未爲能盡其性也。故中和一致而天池自我乎位。萬物自我乎育。嗚呼至矣盡矣。非虛言也。

夫至誠則無事矣。未至於誠必有物以蔽之。蔽則不亮而未免於自欺。故必物格知至而後意誠。此大學所以言格物也。誠之未至必有物以

過之過則不直而不能以通流故必致曲通礙  
而後誠至此中庸所以言致曲也致曲則疎暢  
直達誠自在矣誠則形不可過也形則著自日  
章也著則明遂光顯也然形則猶滯於象滯則  
尚未活動著則猶著於影著則尚未變通明則  
尚疑有光景景則迹未融而誠尚在非化也化  
則乃可以言至誠故曰唯天下至誠爲能化  
人存政舉故人道敏政人道敏政故爲政在人

是故必敬大臣也、必體羣臣也、必知尊賢也、知尊賢則自然知其孰爲大臣而當敬、孰爲羣臣而當體矣、等殺有不然乎、然何以知其爲賢也、蓋取人之本在身、又必先修身以爲取人之本焉、身又當如何修、修之以天下所共由之五達道也、道又當如何修、修之以吾身三達德之仁也、而仁又非他、反而求之、卽此人是已、故曰、仁者人也、是故欲修身者、不可以不知人、而仁

之發莫大於親親有人則有義而義之用莫大於尊賢則修身卽爲仁尊賢卽爲義矣原非在外也有人必有禮而禮之施則尊親有序親賢有秩亦非在外也夫仁卽此人則君子固不可以不知人而出之爲義生之爲禮義實天之制禮實天之經則君子尤不可以不知天矣旣知人又知天則身修而取人之本豫矣修身則能順親可知也取人則能尊賢而敬大臣體羣臣



又可知也。由是而子庶民來，百工柔遠，人懷諸侯，以爲政於天下，有不易易乎哉？故曰：爲政在人，取人以身，修身以道，修道以仁。而仁者，人義與禮者，天天之未始不爲人，人之未始不爲天也。故知天知人，則身修而自能取人。嗚呼！盡矣。下文天道人道皆說知天知人以修身事故詳言之。蓋不患其不能爲政而患其不能取人，不患其不能取人而患其不能修身也。

思知人不可以不知天而天道則不勉不思而從容自中所謂誠者也思知天又不可以不知人而人道則必詳擇此不勉不思從容自中之善而固執之不敢失所謂誠之者也故誠者其道自然是謂至善是以謂之天也誠之者之其所自然是謂擇善是以謂之人也故道以誠爲至而學以思誠爲功天固未始不爲人人亦未始不爲天則我爲誠之亦爲誠者而修身之事

畢矣。豈別有修之之功哉。我自有天而我自知之耳。我自有。人而我自知之耳。一誠焉已矣。一善焉已矣。故中間兩言所以行之者。一指此誠也。指此善也。善卽誠而誠卽善。一實理而無以尚自其真實不虛曰誠。自其物莫能尚曰善。又一也。故次言明善誠身。終言擇善固執。明則待於擇。擇則無不明。然善又如何擇。下文博學五句正所以擇善而誠之之事也。自今觀之。夫子

每教人博文矣。雖顏子亦每從事於斯矣。但學者但知徒博而不知反約。唯顏子能知夫子之善誘。卽於博文之中而擇乎中庸。遂得一善云耳。蓋謂之曰博學。則自朝至夕。凡目之所視耳之所聽。口之所味。身之所邁。足之所履。手之所持。一切五倫交接酬應。何莫非學。也何莫非學。則何莫非文。無往非文。則無往非博矣。故曰博文然博矣。而約者何在。詳矣。而至一者何在。

吾又於何而擇之而執之哉不就明師良友而  
審問焉不可也問而曰審則非汎問可知矣旣  
問旣審而得夫疑信相叅之機則退而思之方  
爲有地然思又不可以不慎也不慎則遠思是  
謂外馳非通微之思也不慎則苦思是謂勞志  
非無思之旨也必慎思之而得其所以憧憧往  
來者然後辨而明之以就正于有道亦庶幾達  
其所謂不思不勉焉者矣是反約之功明善之

學也而能篤而行之者誰歟或日一至或月一  
至不啻足矣故又曰篤行之生知者一而學知  
者以百能之而不讓生知者十而困知者以千  
能之而不辭必得乃已弗得弗措果能如是篤  
行雖愚必明況非愚邪雖柔必強況非柔邪故  
必篤行此審問慎思明辨之功務得一善焉乃  
已尤爲擇善誠之者之最要切處故以篤行終  
焉此唯顏子能之若由賜之徒非不由審問慎

思明辨以恍惚其所謂一者而篤行之弗力是以不能期月守不能拳拳服膺而弗失非不能服膺之罪也未見其的然有可守之實而遂自以爲足之罪也非不能期月守之罪也未得而自以爲得而不肯篤實而力行之以求其實得之罪也實得則誠矣誠者實之謂也旣實得又烏用守若又有待於守有待於固執焉非實得也卽此不誠甚矣非誠也非天道也若夫博文

之旨、則民咸用之、百姓與能之、愚夫愚婦其由之矣、夫誰不學、夫誰能離之、而不博

無德而作禮樂、愚而好自用也、無位而作禮樂、賤而好自專也、有德矣、有位矣、而不當時而作禮樂、生乎今之世、反古之道也、夫自用也、自專也、生今而反古也、如是而災不及其身者、未之有也、夫議禮制度、考文、此王者之禮樂而有德、有時、有位之天子之所作也、若非此等天子而



欲議禮制度、考文以興禮樂、得乎試觀天下之  
今日、時王之制作尚在、庶民之信從未改、故車  
則同軌、無敢制度者、書則同文、無敢考文者、行  
則同倫、無敢制禮者、是故雖有其位、苟無其德、  
不敢作禮樂焉、可見王天下者、其所重先、在德  
也、雖有其德、苟無其位、不敢作禮樂焉、可見王  
天下者、其所重又在位也、有德有位而不當時、  
則夏殷是已、今之所用者周禮、吾不從周而誰

從哉可見王天下者其所重尤在時也故曰王天下有三重焉有此三重而後議禮制度考文以作禮樂則無自用自尊生今反古之失灾不及身而過可寡矣故又覆言之曰上焉者有德有位而不當時是無徵也無徵不信不信民弗從三重缺其一是以不可下焉者有德而無位與時是不尊也不尊不信不信民弗從三重缺其二尤不可矣故君子之道本諸身有其德也

徵諸庶民又信且從有其位當其時也如此則  
三重在我寧獨可以寡過乎哉將見考三王而  
不謬雖三王不能違時也建天地而不悖雖天  
地不能違時也以質鬼神則鬼神不疑吾不能  
違時之論也以俟百世則百世聖人不惑吾不  
能違時之言也然則時乎時乎固聖王之所獨  
重矣以夫子之聖而不當時又安能已吾夫子  
又安能已於反覆而言之詳也與哉雖然若夫

子者又豈時位之所能限也看使時位而可以限

夫子則夫子亦與千古帝王百世聖人等耳烏

在其為賢於堯舜劉批賢於堯舜今始明白生民以來之所未有者乎故

夫子亦自知之夫子亦自言之若曰質諸鬼神

而無疑知天也百世以俟聖人而不惑知人也

夫學以知天知人也則萬古同一天萬古同一

人是看○看謂萬世一時天且弗敢違之矣而何時之

待乎是謂萬世為土人人胥載之矣而何位之

有乎。是故唯無動也。動卽世爲天下道而豈直  
當世唯無言也。言卽世爲天下法而豈直當世  
唯無行也行卽世爲天下則而豈直當世近而  
千百年服之無斁而厭者誰遠而萬億載望卽  
興思而欲從末由不心服者又是誰此可以見  
夫子之無時不然矣。此可見時之不能違吾夫  
子矣。夫子雖以此稱君子其實蓋自謂也。彼君  
子者又烏能然。以今觀夫子其果世爲天下道

世爲天下法與則否也夫子之言真若合符契矣故復引詩以自明

夫君子安能不從時也必也至聖乎至聖則聰明睿智已具雖未嘗臨民而足以有臨也寬裕溫柔等威具雖未嘗容物而自足以有容有執有敬有別也蓋涵之爲溥博淵泉之德而時出之爲莫不說莫不敬其不信之施時在聖人不過以時出之而已又何時之待也況有位與否

邪是以聲名洋溢乎中國施及蠻貊舟車所至  
人力所通天之所覆地之所載日月所照霜露  
所墜凡血氣含生之屬莫不尊之如天地親之  
如父母故曰配天以今觀吾夫子夫孰不尊夫  
孰不親從今以後以至萬億年載其尊且親但  
見其有加而不替矣豈若當時之王見在則尊  
過則已見在則親過則已者所可比邪又豈能  
以一人之身合中國蠻貊盡舟車人力之所至

所通天地之所覆載日月霜露之所照所墜乎  
則夫子之澤遠矣廣矣夫子之言至是又若符  
契矣故稱之曰至聖焉吾以謂千古可以語至  
聖者夫子也夫子雖以推之至聖其實蓋自許  
云

夫子之意曰今天下萬世皆尊之以爲天親之  
以爲父無可疑矣然欲其能真知其所以可尊  
可親者則未也何也以人至於至聖則實未易



知也何也至聖者至誠者也故唯天下之至誠  
爲能經綸天下之大經立天下之大本知天地  
之化育經大經一仁也人但見肫肫其仁焉耳  
初何嘗倚於仁也立大本一淵也人但見淵淵  
其淵焉耳初何嘗倚於淵也知化育一天也又  
但見浩浩其天焉耳初何嘗倚於天也是之謂  
至誠之真經綸真立本真知化矣知化則本自  
立本立則綸自經苟不固聰明聖智達天德者

其孰能知此也。蓋唯至誠乃能知天下之至聖也。唯至聖乃能知天下之至誠也。則必有夫子而後能知夫子也。又何疑哉。夫子在當時雖由之強。夫子每對之而嘆曰。知德者鮮。雖賜之穎。夫子必對之而嘆曰。莫我知也。夫獨一回而不幸。短命則夫子已不見。知於當時矣。況萬世與雖尊之以爲天親。之以爲父母。敬而事之以爲萬世之宗師。夫子弗善也。夫子弗樂也。夫子弗。

享也。嗚呼！此固夫子之所以爲至聖也。

有子言禮之用，和爲貴，甚是也。夫使禮而不出於和，則爲強世，非中節之和，天下之達道矣。曷足貴？與又烏在其爲美也？唯其和，所以民咸用之，萬世同之，自無不可行之理耳。彼或有窒礙而不可行者，非和之罪也。不知和之罪也。今若曰：知和而和，不以禮節之，是以亦不可行。如此則和反不如禮，和又不足爲美而可貴矣，何也？

必待禮以節之故也和而尚須禮幫助然後能  
中節而成和則宜曰和之用禮爲貴可也而何  
以獨貴和魯故曰此非有子之言也有子弟子  
之言也

子貢欲去告朔之餼羊非愛羊也傷時君之廢  
禮也夫子不欲去告朔之餼羊非不愛羊也異  
時君之能復禮也全賴聖賢相與發明而筆之  
於書然後人知告朔之禮不當廢又知告朔之

禮所當復此春秋旨也吾因是而知聖賢愛禮之深也今若徒泥夫子之言以謂賜也但知愛羊而不愛禮則聖賢之意荒矣

夫子語太師之知樂全是聲容節奏之間此亦何難知者而夫子故語之邪曰此正所謂樂之可知者也故曰樂其可知也夫始作而翕如縱之而純如皦如繹如則樂成矣此則太師之所知也至其所不可知者則出於聲容節奏之外

可以。和。神。人。而。協。上。下。可。以。儀。鳳。凰。而。舞。百。獸。  
如。季。札。所。謂。如。天。之。無。不。覆。也。如。地。之。無。不。載。  
也。吾。夫。子。所。謂。不。圖。爲。樂。之。至。於。斯。也。聞。之。三。  
月。而。不。知。肉。味。也。則。太。師。當。自。得。之。非。夫。子。之。  
所。能。語。也。所。謂。樂。之。所。不。可。知。者。也。

舜。之。稱。禹。曰。克。勤。于。邦。克。儉。于。家。可。知。古。之。聖。  
人。語。勤。儉。莫。有。過。者。矣。今。觀。禹。之。言。曰。予。乘。四。  
載。隨。山。刊。木。夫。以。帝。臣。之。重。跋。涉。九。州。隨。山。刊。

水卽大而乘車小而乘馬無不可者乃水行則以木爲舟陸行則以木爲履下山則前高後低上山則前低後高經言其手足胼胝不辭勞苦史稱其肢體偏枯卒受風寒暑濕之患終葬會稽之山則當時稱禹者固以儉而所以病禹者亦謂其過於儉而不可以垂訓也故夫子獨以無間然稱之其意若曰如禹之儉勤吾實無間然矣無間然言其無間隙之可議也而敢以議

禹是何心哉。故重言無間。然以深釋之。夫菲飲食。是其儉也。而致孝鬼神。則祭祀極其豐潔。不儉也。惡衣服。是其儉也。而致美黻冕。則祭服極其潔精。不儉也。卑宮室。是其儉也。而盡力溝洫。則一財一力。皆爲民費。無一毫而不用之於民者。不儉也。夫舍己之飲食衣服宮室。凡所以奉身者。無不薄而唯知神之與民也。如此是尚可。以儉病之哉。故再言禹無間。然以深美之。禹之



墨後傳而爲墨翟則與夫子同時于時天下並  
重之故其稱曰孔墨孔子稱禹而於墨翟之儉  
不敢闢以爲非蓋信其傳之有自也今墨子之  
書具在有能取其書讀之而得其所以非樂之  
意則經綸之術備焉斷斷乎可以平天下而均  
四海也雖作用手段各各不同然但可以致太  
平亦何必拘一律哉孟氏以無父闢之過矣是  
闢禹也禹過門不入者三是無父之甚者何不

關乎

人與禽獸全然不同。孟子何以但言幾希？曰：禽獸雖殊類，然亦有良知，亦有良能，亦知貪生，亦知畏死，亦知怕怖。刑法何嘗有一點與人不同？只是全不知廉恥，爲可恨耳。若人則必有羞惡之心，是其稍稍不同於禽獸者，賴有此耳。非幾希而何？所賴者正以有此幾希之異故，可以自別於禽獸而所患者，又以所異不過只於幾希。

亦容易。遂入於禽獸也。是以庶民不知幾希之  
可懼而遂去之。以入於禽獸之中。而唯君子知  
此幾希之有賴。每兢惕以存之。而遂自異於禽  
獸之倫焉。故言幾希正以見其大。可畏。而又有  
大可喜者在焉耳。若舜也。禹也。湯也。文武也。周  
公孔子也。皆所以存此幾希者。所謂君子也。豈  
其初真有異於禽獸哉。亦曰存之而已。存之者  
初無難事。異之者不過幾希。而其究也一爲聖

賢一爲禽獸天淵懸矣嗚呼可不存與若我則  
私淑夫子之道者也其亦幸免於禽獸之歸哉  
此孟子志也

右二十四章

秣陵焦尊生